

Ha'u nia respeito ba Sua Exelénsia husi Ministériu Edukasaun

Iha loron ida-ne'e, Embaixada Estados Unidos Amérika sei fó ajuda máskaras hena reutilizável hamutuk 15,000 ba Ministériu Edukasaun. Máskara hirak ne'e parte ida husi esforsu boot hodi apoia Timor-Leste iha luta hasoru COVID-19.

Too agora, Estados Unidos Amérika fornese ona \$1.6 miliaun iha esforsu ida-ne'e. Ne'e inklui \$1.1 miliaun ne'ebé ami fó ona iha fulan Marsu liubá.

No ohin mós iha Ministériu Saúde, ha'u ho orgullu lansa USAID nia projetu ida ho montante \$500,000. Projetu ne'e sei funsiona liuhusi UNICEF hodi fornese facilidades bee no saneamentu ba postu saúde sira iha Timor-Leste.

Aleinde ne'e iha semana hirak tuir-mai Embaixada Estados Unidos Amérika sei lansa projetus lubuk ida ho montante pelumenus \$125,000 no posivelmente sei barak liutan.

Iha Ministériu Edukasaun ne'e, máskara sira ne'ebé ohin ami fornese, sei apoia Timor-Leste enkuantu Ministériu Saúde prepara daudaun atu labarik sira fila-fali ba salas-de-aula.

Máskaras hirak ne'e sei benefisia alunas rihun ba rihun no promove ambiente aprendizajen seguru no saudável.

Ami orgullu tebes tanba feto Timoroan nain ruanulu mak suku máskaras hirak ne'e. Projetu ida-ne'e apoia esforsu sira Estados Unidos Amérika nian hodi fornese oportunidades ekonómika ba traballadór lokal sira no oferese solusaun sira ne'ebé sustentável.

Estados Unidos Amérika nia Komando Indo-Pasífiku fornese ona finansiamentu ba projetu ne'e. Ha'u nia agradesimentu ba koordinadór Adidu Defeza Embaixada Estados Unidos Amérika nian Majór Ezérsitu Estados Unidos Pablo Valerin ba nia esforsus hodi halo ida-ne'e sai realidade.

Ami sauda Povu Timor-Leste nia korajen hodi luta hasoru COVID-19. Ami enkoraja adere nafatin ba distansiamentu física, fase liman no medida sira seluk ne'ebé governu aplika ona, maske hamenus ona aspetu balun husi Estadu Emerjénsia.

Obrigada barak